

VENDIM
Nr.19, datë 4.3.2011

PËR PRANIMIN E KËRKESËS PËR RISHQYRTIM TË VENDIMIT TË ERE-S NR.10,
DATË 18.2.2011

Në mbështetje të nenit 9 të ligjit nr.9072, datë 22.5.2003 “Për sektorin e energjisë elektrike”, të ndryshuar dhe nenit 16 të Rregullave të Praktikës dhe Procedurave të ERE-s, Bordi i Komisionerëve të Entit Rregullator të Energjisë (ERE), në mbledhjen e tij të datës 4.3.2011, pasi shqyrtoi kërkesën ankimore të paraqitur nga shoqëria “Albanian Chrome” sh.p.k., për heqjen e statusit të klientit të kualifikuar dhe rikthimin në statusin e klientit tarifor,

konstatoi se:

Së pari, pretendimi i parë i shoqërisë “Albanian Chrome” sh.p.k., nuk qëndron, pasi ERE nuk ka miratuar aspak me një procedurë të shpejtuar kërkesën e shoqërisë “Antea Cement” sh.a. për heqjen e statusit të klientit të kualifikuar dhe marrjen e statusit të klientit tarifor, por ka marrë vendimin e saj brenda 30 ditëve, siç parashikohet në rregulloren për dhënien dhe heqjen e statusit të klientit të kualifikuar. Gjithashtu, vlen të përmendet fakti se ERE përpara se të merrte vendimin e saj për “Antea Cement” sh.a., ka marrë në konsideratë edhe konfirmimin nga ana e “CEZ Shpërndarje” sh.a., se është i gatshëm të furnizojë pa kosto shtesë shoqërinë “Antea Cement” sh.a. nga periudha e kërkuar nga vetë shoqëria “Antea Cement” sh.a. Ndërsa në rastin konkret “CEZ Shpërndarje” sh.a. edhe pse ERE ka pritur deri në ditën e fundit të afatit që përcakton rregullorja për dhënien dhe heqjen e statusit të klientit të kualifikuar, nuk ka depozituar asnjë konfirmim për të furnizuar shoqërinë “Albanian Chrome” sh.p.k. nga periudha e kërkuar nga kjo shoqëri.

Së dyti, sa i përket pretendimit të dytë të sipërpërmendur të “Albanian Chrome” sh.a., në interpretim të nenit 16 të Rregullave të Praktikës dhe Procedurave të ERE-s “Ridëgjimi dhe ankimi kundër vendimit të Bordit”, vihem përpara përgjegjësisë për të rishqyrtuar vendimin e ERE-s nr.10, datë 18.2.2011 “Për mosmiratimin e kërkesës së shoqërisë “Albanian Chrome” për marrjen e statusit të klientit tarifor sipas kërkesës së tij për kthimin në klient tarifor nga data 1 shkurt 2011, dhe sipas çmimeve të miratuara nga ERE me vendimin nr.100, datë 7.12.2010”. Kjo për arsye se shoqëria “Albanian Chrome” sh.p.k. në ankesën e paraqitur në ERE parashtron se ka siguruar një provë të re (konfirmimin e “CEZ shpërndarje” sh.a., për ta furnizuar pa kosto shtesë), e cila mund të ndryshojë vendimmarrjen e ERE-s.

Për gjithë sa më sipër cituar, Bordi i Komisionerëve të ERE-s

VENDOSI:

1. Të rishqyrtojë vendimin e saj nr.10, datë 18.2.2011 “Për mosmiratimin e kërkesës së shoqërisë “Albanian Chrome” për marrjen e statusit të klientit tarifor sipas kërkesës së tij për kthimin në klient tarifor, nga data 1 shkurt 2011, dhe sipas çmimeve të miratuara nga ERE me vendimin nr.100, datë 7.12.2010”, për të lejuar palën e interesuar të paraqesë provën e re.

2. Shoqëria “Albanian Chrome” sh.p.k. të paraqesë provën e re deri në datën 7 mars 2011.

3. Drejtoria Juridike dhe e Mbrojtjes së Konsumatorit të njoftojë shoqërinë “Albanian Chrome” sh.p.k. për vendimin e Bordit të Komisionerëve të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Bujar Nepravishta